

G  
C  
1046/m2



R E G V L A E  
P R O V I N C I A L I S .

De ijs, quæ ad eius personam, &  
communem totius prouinciæ  
administrationem spe-  
ctant. Cap. I.



V A E Præpositis domorum, & Re-  
ctoribus, quod ad eorum personas at-  
tinet, in regulis præscribuntur, eò di-  
ligentius seruare enitatur Prouincia  
lis, quo pluribus pro ratione officij sui vitæ spiri-  
tualis studio præire debet.

2 Finem officij sui (quem ante oculos habebit) in  
eo positum esse intelligat, ut prouinciam sibi com-  
missam; in acquirenda perfectione, iuxta proprij in-  
stitutionem, & regulas ipsi datas promoueat.

3 Imitetur in gubernatione caritatem, mansue- *In bullis In*  
tudinem, & benignitatem Christi Domini nostri, *stituti So-*  
cietatis.  
ut iuxta eam normam, quam tradiderunt Apo- *a 1. Petri*  
stoli, *a non dominans, sed forma factus gregis ex* *c. 5.*  
animo exemplo magis, quam uerbo subditos ad per-  
fectionem dirigat.

A 2 Sene-



4 *Seueritatem suo tempore cum benignitate miscet, suamque auctoritatem per solidas virtutes tueatur, ac dilectionem, & curam suorum praesefere-  
rendo modeſte, & circumſpecte praecipiendo, ita  
amabilem se reddat, ut omnes fidenter ad illum re-  
currere poſſint.*

*Par. 9. c. 6.  
§. 1. & lit.  
A.*

5 *Solicite animum ad gubernationem applicet,  
neque tamen in ea ita diſtrahatur, ut in studio ora-  
tionis, & ſanctis deſiderijs, quibus totam ſuſtenta-  
re debet Prouinciam, intepescat. quamuis autem or-  
dinarie concionari non debet, ſi quando tamen per  
occupationem officij ſui commode licebit, & hoc, &  
alia Societatis miniſteria exercere poterit.*

6 *Nullas regulas, aut ordinationes, aut conſuetu-  
dines uel abroget, uel inducat in conſulto Generali,  
ſed ſecundum eas, quas habet gubernet Prouinciã.*

*P. 9. c. 3. §.  
8 & lit. D.  
& p. 4 ca.  
10. lit. B.*

7 *Sicut Prouincialis, quando neceſſe eſt, in regu-  
lis, ordinationibus, decretis, & in ipsis etiam con-  
ſtitutionibus cum particularibus diſpensare poteſt,  
ſic cum diſpenſauerit in rebus maioris momenti, qua  
uideantur urgere, & in quibus ſine graui incom-  
modo Generalis reſponſum expectari nequeat, de-  
bet eum primo quoque tempore de huiusmodi di-  
ſpenſatione; & eius cauſa admonere.*

8 *Præter facultates, quæ in regulis concedun-  
tur, habet etiam eas omnes, quæ in compendio fa-  
cultatum Societatis Prouincialibus conſeſſe ſunt,  
quas ex compendio ipſo intelliget.*

*Omnes*

9 Omnes facultates eorum Superiorum, qui Provinciali subordinati sunt, ad ipsum quoque pertinent, ab ipsoque etiam suspendi poterunt, quando ei expedire in Domino videbitur.

10 Viceprovincialis easdem omnino facultates habeat, quas Provincialis nisi à Generali, uel Provinciali limitentur: ipse uero rationem administrationis non immutabit.

De iis, quæ illum ad bonam Provinciae administrationem iuuabunt. Cap. II.

II **C**onsultores quatuor habebit a Generali designatos in ijs locis, ubi frequentius residet, quoad fieri poterit, cum quibus res grauiores communicabit: quod si absentes sint, per transmissas litteras: <sup>b</sup> quorum unus ab eodem Generali constitutus erit eius admonitor, & socius. In quavis autem domo, uel collegio opera Superioris, & eius consultorum, quos ad consultationem adhibendos iudicauerit, utatur in rebus ijs, de quibus ordinarie consultandum erit.

P. 9. c. 6. §.

13.

b Ibidem,  
c. 4. §. 4.

12 Si expediret præter Consultores, alios etiam nonnunquam ad Consultationem uocare poterit; & eos quidem, quos de rebus propositis melius iudicare posse existimauerit; uel si absentes sint, iu-

A 3 bere,



bere, ut de rebus ijsdem sententiam suam ad se transmittant.

13 Literas, & scripta, quæ pertinent ad rem, de qua consultatio habenda est, ostendat Consultoribus (nisi quid obster) ut bene informati sententiam suam melius dicere possint.

14 Cum ordinationes aliquas communes a Generali acceperit, illas Superioribus suæ Prouinciæ, & Consultoribus manifestari faciat.

15 In proponenda re, de qua deliberandum est, in neutram partem animi sui propensionem ostendat, ne consultoribus declinandi in eam partem detur occasio, sed quisque liberius in Domino suam sententiam aperiat.

16 Si quando aliquid occurrerit, de quo non liceat cum Consultoribus agere, poterit iuxta primum, & secundum modum in exercitijs ad electionem faciendam traditum, quid agendum sit deliberare.

Par. 9. c. 4.  
§. 4.

17 Libenter se ab alijs admoneri patiatur de ijs, quæ ad officium, & personam suam pertinent, & eum præcipue, qui Admonitoris officio fungitur, benigne audiat.

18 Habeat secum literas Apostolicas authenticas, & compendium facultatum Societatis, constitutiones, decreta, regulas omnes, & quæ a Generali ordinantur, eaque bene intelligat, & obseruari faciat.

In

19 *In loco, in quo diutius ei residendum est habebit Archiuum, in quo asseruabit instrumenta authentica, libros, & cætera, quæ ad officium Provincialis, & communem usum provincie pertinent, quæ omnia ex catalogo a se subscripto successori tradet.*

20 *Habeat libellum, in quem referat ea, quæ consultanda, uel providenda, uel ad Generalem scribenda sunt, ne memoria excidant.*

21 *Orationes, & missas ad tempus indicere poterit etiam in tota provincia pro causis, quæ uidebuntur id exigere, modum tamen in eare non excedat.*

Par. 2. c. 3.  
§. 2. & p.  
7. c. 2. lit.  
M & c. 4.  
§. 3. & par.  
10. lit. B.

## De Superioribus ei subordinatis, & eorum officialibus. C. I I I.

22 **E**T SI *Præpositos domorum, & Rectores collegiorum, & domorum probationis suæ provincie constituere non potest, si tamen necesse esset aliquando mutationem facere Superioris alicuius, & periculum esset in mora, poterit aliquem qui uices Superioris gerat, interim constituere, donec Generalis admonitus provideat: Ministros autem, Procuratores, & Præfectos studiorum ipse designabit, & Subministros, & Præfectos infirmorum etiam ubi opus esse iudicauerit.*

P. 2. c. 3. §.  
3. & 14.

23 *Constituatur Magistros nouitiorum in domibus, & locis probationum non separatis, a Gene-*

Par. 3. c. 1.  
§. 12.



ralitamen confirmandos, & eos quidem, qui in rebus spiritualibus exercitati sint, & in modo procedendi Societatis nostrae bene probati.

P. 4. c. 10.  
S. 7.

24 Designabit Praefectos rerum spiritualium in omnibus collegijs, & domibus professis, quales in prima regula officij illorum describuntur; itemque ordinarios nostrorum Confessarios, ex quibus serè conueniret Praefectos rerum spiritualium deligere.

25 Deligere poterit Consultores, & Admonitores eorum, qui praesunt in Prouincia, ita ut statim suo officio fungi possint: scribet tamen de ijs ad Generalem, ut ab eo confirmentur, antequam Consultores nominentur.

Can. 7.  
tr. congr.

26 Praedicatores, & Confessarios ipse constituet, praemisso tamen domestico examine, & approbatione Ordinariorum iuxta formam Concilij Tridentini.

b P. 4. c. 6.  
li. F. & c.  
13. S. 3.  
c Ibidem  
c. 17 lit. A.  
d Ibid. c.  
7. lit. A.  
e Ibid. c.  
12. lit. C.

b 27 Lectores ordinarios in omnibus classibus, & primarios officiales praeter Rectorem, & Cancellarium in vniuersitatibus deligat, nouas tamen lectiones non addat, nec scholas usquam aperiat, nec etiam puerorum in legendo, & scribendo instruendorum Praeceptores sine facultate Generalis instituat.

P. 8. c. 1. S.  
4. & 6.  
P. 9. c. 6. S. 2.

28 Tueatur auctoritatem Superiorum immediatorum in subditos, ita tamen, ut constet posse omnes ad mediatos recurrere: ideo quicquid agendum, uel immutandum erit, quod ad immediatorum officium

per-

pertineat, per eosdem fieri curabit.

29 si quos ad gubernationem idoneos iudicabit, curet de illis paulatim & negotijs tractandis, & domesticis ministerijs obeundis experimentum sumere, ut & ipsi talenti accepti specimen dare, & Societatis officia eis tuto committi possint.

30 Obseruet si qui detineantur in ministerijs aliquibus, qui magis idonei essent ad alia: eam tamen habeat cuiusque rationem, ut uniuersale bonum semper preferatur.

31 Neminem ab obedientia Superiorum immediatorum inconsulto Generali eximat, nisi periculum esset in mora; & tunc certiores faciat Generalem de persona, & de causis propter quas eam exemerit. P. 8. cap. 1. li. E.

### De admittendis. Cap. IIII.

32 **E**OS ad probationem per se, uel per alios P. 1. c. 2. admittere poterit, quos ad institutum nostrum idoneos in Domino iudicauerit: cauebit tamen, ne cuiusquam admissio iustam aliquam externorum, offensionem, aut Societatis nocumentum pariat. quod cum ijs potissimum obseruandum erit, qui in scholis nostris instituuntur.

33 Attendat ne nimij sint nostri in hominibus ad Societatem alliciendis: sed per uirtutes, & bonae uitae odorem omnes ad Christum trahere studiose curent.

Memi-



P. 10. S. 3. 34 Meminerit, quod inepta turba ad institutum nostrum admitti non debet, & obseruari faciat in hoc diligenter regulas officij Examinatoris.

In ex. c. 2. S. 6. & lit. D. & p. 1. c. 3. lit. G. 35 Quod ad prima quinque impedimenta atinet; etsi Societas in nullo eorum dispensare potest, si tamen in eo, qui admitti petit, dona aliqua Dei illustriora cernerentur, Generalem admoneat, quod si de eiusmodi impedimētis dubitaret ad eūdem recurrat.

P. 1 c. 3. S. 2. & li. H. 36 In secundarijs impedimentis dispensandi facultatem habebit, præterquam in deformitate magna, aut defectu insigni, qualem habent Eunuchi, & in ætate infra 15. & ultra 50. expletos annos, & in coniugatis etiam in casu, in quo non est impedimentum essentiale.

In ex. c. 4. S. 2. f Can. 2. tr. congr. g In ex. c. 4. S. 43. 37 Poterit in casu aliquo antepone, & postponere aliqua ex sex experimentis, eaque moderari, & alia in alia permutare, dummodo biennio; & bene probentur Nouitij; Quod etiam tempus prorogare poterit, si opus esse iudicauerit.

Can. 2. tr. Cong. 38 Poterit etiam cum Nouitijs in secundo anno probationis circa studia dispensare, habita ratione personarum, locorum, & temporum prout expedire in Domino iudicabit.

P. 1. c. 2. S. 2. & p. 4. c. 3. S. 2. & in 1. Cong. titu. 6. decret. 24. 39 Coadiutores temporales plures esse non debent, quam qui necessarij sint ad subleuandas domos, uel Collegia, in rebus quibus occupari Sacerdotes, & Scholastici non possunt, sine detrimento maioris boni.

De

## De dimittendis. Cap. v.

40 **F**acultatem habet dimittendi eos, qui in prima, & secunda probatione ante, & post emis-  
P. 2. cap. 1.  
lit. C.  
 sa uota uersantur. Scholasticos autem approbatos, & coadiutores non formatos, qui probationem absoluerunt, non dimittat, nisi in grauibus, & urgentibus casibus, & qui eiusmodi sint, ut sine graui periculo Generalis responsum expectari nequeat: de his tamen post dimissionem, Generalem certiore faciat adiunctis causis dimissionis: in alijs uero casibus consulatur Generalis, & eius responsum expectetur.

41 Si dubitaretur in aliquo, an res esset toleranda, & periculum in mora esse uideretur, donec à Generali ueniat responsum, uideat, ubi is possit minori cum dispendio detineri: <sup>h</sup> Idem intelligatur de insigniter benemeritis de Societate, & de ijs, qui à  
h P. 2. c. 1.  
lit. C.  
 Generali in eius Prouinciam missi sunt, in casibus etiam palam grauibus, & urgentibus: eos enim ne in his quidem casibus sine Generalis facultate poterit dimittere.

42 Prouincialis erit, iuxta commissam sibi facultatem, auditis consultoribus iudicare de causis sufficientibus ad dimissionem: curabit tamen, ne ad hæc extrema, nisi quam consultissime, & alijs tentatis remedijs ueniatur.

43 Coadiutores formatos siue spirituales, siue  
P. 2. c. 1.  
lit. C.  
 tempo-



temporales, & profesos nullo modo dimittet.

44 Circa modum dimittendi obseruet ea, quæ in secunda parte constitutionum cap. 3. dicuntur; & intelligat, an is, qui dimittitur, aliquid societati dederit, et si quid ei reddi oporteat, iuxta eiusdem cap. declarationem.

i P. 2. c. 3.  
lit. B.

Par. 2. c. 4.  
§. 3.

45 Declaretur ijs, qui dimittuntur, quod absoluti maneant a uotis simplicibus, si ea iuxta formulam Societatis consuetam emisserint.

K P. 2. c. 4.  
lini. cong.  
tit. 2. §. 10.  
& can. 7.  
tr. congr.

46 Circa dimissos, aut egressos è Societate, & postea reductos, uel sponte redeuntes obseruentur ea, quæ<sup>k</sup> in constitutionibus<sup>l</sup> & decretis dicuntur: & si admittantur, denuo examinentur, & probentur; prout ipsi uidebitur. si quis autem semel egressus erit, poterit quidem iterum admitti, sed aduertatur, huiusmodi homines raro idoneos ad instituti nostri disciplinam inueniri.

## De litterarum studijs. Cap. vi.

P. 4 c. 12.  
& 13. &  
c. 6. §. 6.  
m Ibidem  
o. 13. lit. C.

47 **I**N uniuersitatibus, & collegijs in quibus nostri litteras profitentur, idoneos, & eruditos professores pro ratione loci, & debiti constituat; <sup>m</sup> & si aliquis lector extraordinarius adijciendus uideretur Generalem consulat.

48 Peculiari cura uideat, num lectiones in scholis nostris, & scholastica exercitationes diligenter, assidue, atque ordine habeantur: num Magistri & discipu-

discipuli suum in Domino officium faciant. & si quid opus esse indicauerit, provideat iuxta ea, quae in quarta par. constitutionum, & regulis habentur.

49 Ipsius prudentiae relinquitur, quid hi, aut illi addiscere debeant iuxta aetatem, & ingenium unius cuiusque ad maiorem gloriam Dei; eos autem, quos non esse aptos ad studia inueniet, ab illis remouere poterit.

P. 4. c. 5. S.  
2. & c. 6.  
S. 5.

50 In addiscendis disciplinis ordinem seruari faciat, efficietque, ut prius scholastici in lingua latina solidum iaciant fundamentum, quam ad alia maiora studia transeant: curabit uero humaniorum litterarum studia magni fieri, & eorum, qui eas profitentur, peculiarem curam haberi: & ne in his professores idonei desint, illorum seminaria & instituet, & conseruabit.

P. 4. c. 6. S.  
4. & c. 5.  
lit. D. & c.  
13. S. 4. &  
lit. E.

51 Aliarum linguarum studium ualde commendatum habeat: hebraica uero ijs tantum concedat, qui in theologiae facultate mediocriter eruditi iam sint, aut certe tam humiles, ut sperandum merito sit, hoc studium sine illorum detrimento utile ualde futurum.

P. 4. c. 6. S.  
5. & lit. D.  
& cap. 13.  
S. 4.

52 Designet aliquos, qui & probatae uirtutis imprimis sint, & ingenio polleant, ut absolutis studijs Philosophiae, & Theologiae ad ea repetenda priuatum, & quietum studium habeant, & positue ac sacrae scripturae se dedant: quo etiam tempore in disputationibus publicis rationem suorum

P. 4. c. 6.  
S. 16.  
n Ibid. S. 4.  
o Ibidem  
S. 17. & c.  
15. S. 3.

studio-



*p. Ibidem* studiorum reddant, *Put* eas facultates priuatim,  
*c. 6. §. 18.* uel publice ad suam, uel aliorum utilitatem profi-  
 teri possint.

*Can. 46.* 53 Diligenter studeat, ut praeceptores philoso-  
*tr. congr.* phiae, cum magno delectu eos Aristotelis interpre-  
 tes legant, qui contra Christiana dogmata impie  
 scripserunt, & ita philosophiam interpretentur,  
 ut Theologiae scholasticae quam nobis commendant  
 constitutiones subseruare faciant.

54 Curet ut ij, qui propensum animum habent  
 ad aliquam facultatem, in qua possunt insignes eua-  
 dere, in ea diutius uersentur, habita tamen spiritua-  
 lis profectus ratione, & de talibus Generalem ad-  
 moneat.

*Par. 4. c. 5.* 55 Qui propter aetatem prouectiorem, aut alias  
*lit. D. & c.* causas in facultatibus superioribus, & scholasti-  
*13. §. 4. &* cis studijs progressum facere non possunt, curabit,  
*lit. E.* ne in illis tempus insument: sed casibus conscientiae  
 discendis dent operam, sintque semper aliqui ex  
 nostris, qui huic studio diligenter incumbant, ut  
 Societas copiam habere possit operariorum, qui con-  
 fessionibus audiendis sint idonei.

56 In singulis domibus, & collegijs aliquem  
 constituat, qui in casibus conscientiae bene uersatus  
 sit, ut difficultatibus domi, & foris occurrentibus  
 satisfacere possit.

57 Comaedias, & Tragedias rarissime agi per-  
 mittat, & non nisi latinas, ac decentes, & prius  
 aut

aut ipse eas examinet, aut alijs examinandas committat: eas uero, atque alias id genus actiones in Ecclesia fieri omnino prohibeat.

58 Sub finem studiorum Generalem de vniuscuiusque talento admoneat, & quantum singuli profecerint, ei referat. Par. 4. c. 9. §. 3.

59 Curet ut nullus ex nostris librum aliquem ex una in alteram linguam transferat, aut imprimat, absque Præpositi Generalis facultate.

## De promouendis ad ordines, & gradus literarios. Cap. VII.

60 **P**otest per se, uel per alios præsentare ex nostris eos, quos idoneos iuxta instructionem a Generali traditam censuerit ad ordines Ecclesiasticos recipiendos, in constitutis tamen Ecclesiæ temporibus.

61 Quamuis in actibus scholasticorum communibus exercendi sunt nostri iuxta constitutiones; nullus tamen ad Philosophiæ, uel Theologiæ gradus, etiam si idoneus sit, promoueatur sine Præpositi Generalis facultate. Par. 4. c. 6. §. 10. & 17. & cap. 15. §. 13.

62 Cum nostri de Generalis facultate in vniuersitatibus Societatis promouendi sunt ad gradus literarios, si qua in re necessaria ad promotionem erit dispensandum (quod rarissime faciendum est, ne huiusmodi



*iusmodi gradus ueniant in contemptum) ubi id fecerit tam de persona, quam de causa dispensandi, admonet eam Generalem.*

63 *Et si Doctoratus, & Magisterij gradus iuxta constitutiones predicto modo nostri accipere possunt, nomine tamen Doctoris, uel Magistri ratione gradus inter se non utantur.*

## De promouendis in professos, & coadiutores formatos, ac scholares. Cap. viii.

*Par. 4. c. 3. §. 3. & p. s. c. 4. §. 3. & 6.* 64 **P**otest admittere post biennium ad uota simplicia scholasticorum approbatorum, & coadiutorum non formatorum, quos in domino idoneos iudicauerit iuxta regulas, & constitutiones.

*In ex. c. 1. §. 21.* 65 *Si quos, ut indifferentes admiserit (quod ratio fieri debet) potest eos applicare ad gradum coadiutorum, uel scholasticorum, sicut magis in Domino conuenire iudicabit: In hac uero classe indifferentium ultra tempus biennij probationis nemo maneat.*

*In ex. c. 4. §. 16. & p. s. c. 1. §. 3. & c. 2. §. 1.* 66 *Scholastici statim finitis suis studijs arbitrio Superiorum, tertium probationis annum in domibus probationum peragant, quod si commode fieri non possit, in domibus Professorum, uel in collegijs probari eos faciat, iuxta regulas nouitatus.*

*Finita*

67 Finita uisitatione consideret, qui sint idonei in sua Prouincia, ut in coadiutores formatos spirituales, uel temporales, aut in profesos iuxta constitutiones, & instructionem a Generali traditam admitti possint, ad eundemque de ea re scribat adhibito prius iudicio Consultorum.

P. 5. c. 2. &  
P. 4. c. 9. § 3

68 Ante quam admittat eos, qui cum Generalis facultate professionem facturi sunt, uel uota coadiutorum formatorum, uideat, & obseruet, quæ ab ipsis erunt facienda: eiusmodi sunt dispositio bonorum temporalium, si quæ adhuc habuerint, exercitia spiritualia, confessio generalis, assertionum de sensio, & alia, quæ in constitutionibus, & decretis congregationum dicuntur.

In ex. c. 1.  
§. 8. & c.  
4. §. 2. &  
27. 38. 41.  
& c. 6. §. 8.  
& p. 5. &  
6. c. 2. §. 12  
& can. 15.  
tr. congr.

69 Qui professionem fecerint, etiam trium uotorum, emittant uota illa simplicia, quæ post professionem emittenda sunt, idque iuxta formulam tertriæ congregationis & doctrinam Christianam tam ipsi, quam coadiutores formati spirituales per quadraginta dies intra annum doceant.

Par. 6. c. 2.  
§. 1. & p.  
10. §. 6. &  
can. 130.  
tri. congr.  
& can. 55.  
tr. congr.

70 Habeat librum, in quo eorum nomina scribantur, qui uota sollemnia, uel simplicia post biennium in domibus, uel Collegijs sue Prouinciæ emittunt iuxta ordinem Præpositis domorum, & Rectoribus traditum.

Par. 5. c. 9.  
& 4.

71 Cum aliqui professionem, uel uota Coadiutorum formatorum fecerint, exempla huiusmodi uotorum, & aliorum quinque, quæ professi post emis-

B sam



nam professionem faciunt, nomine ipsorum subscripta ad Generalem quamprimum transmittat.

P. 6. c. 2. §.  
3. & 4. §.  
p. 4. c. 10.  
§. 3.

72 Constituat, iuxta constitutiones, ut professi, & coadiutores spirituales formati suæ prouinciæ in domibus professis, quantum fieri potest, commorentur.

## De rebus collegiorum, & Domorum. Cap. IX.

73 **A** Edificia conseruari, & si opus erit instaurari curet: quod si quæ edificanda maioris momenti fuerint, ut esset templum, dormitorium uel aliquid huiusmodi nisi approbante Generali non fiant, ad quem pertinet formam, & modum nostrorum edificiorum præscribere.

74 Redditus, & reliqua stabilia conseruari curet, & an crescant, uel minuantur, intelligat: si quis autem huiusmodi bona augere uellet, uel aliquid donare, poterit id admittere; si tamen conditiones aliquæ exigerentur, non nisi approbante Generali ullam admittat: & eodem modo, quæ dantur domui professe accipere; & si quid stabile donatum fuerit, etiam uendere poterit: si tamen domui necessarium pretium non esset, & trecentorum ducatorum ualorem excederet, consulat Generalem, ut de eo iuxta ipsius præscriptum disponat.

Quam-

75 Quamuis potestatem habeat conferuandi, & defendendi res collegiorum etiam in iudicio cum facultate alios substituendi, si id necessarium, & conueniens fuerit, id tamen curabit efficere, ut omnes nostri, quo ad fieri possit, lites fugiant. Quocirca primum compromissione rem nitatur componere, quod si id nulla ratione assequi possit, non concedat tamen litem intendi a nostris, nisi in re alioqui necessaria, & saltem postea de ea Generalem admoneat.

76 Intelligat, an exempla authentica contrarium maioris momenti, præsertim rerum perpetuarum ad Archiuum, quod est in Vrbe penes Præpositum Generalem, missa sint, alioqui mittenda curabit.

In 1. cong.  
tit. 6. de  
cret. 24.

77 Videat computa inter Superiorem, & Procuratorem transacta, rationemque exigat, accepti, & expensi, & resolutionem ultimi sui computi summam scribi faciat, quam ipse subscribet in libro ad hoc designato: In hoc autem scripto, simul constet tam de summa accepti, & expensi ab ultima uisitatione, quam de eo, quod residuum fuerit, uel etiam si quid debiti maneat.

78 Visitet bona stabilia extra domum, quæ sine magno incommodo uisitari possint, ut uideat, num qua instauracione, uel cultura egeant, & quid ad eorum conferuacionem opus sit.

79 Si domus, uel collegia cum commoda fundat-

P. 4. c. 2. §. 1

B 2 tione



Et p. 2. c. 3. §. 17. tione offerentur, expendat quid ad commune bonum ex ijs speretur, Et an aliqua conditiones exigantur, Et an locus sit salubris, Et omnia ad Generalem referat, nihil interim certi promittendo.

Can. 34. §. 1. 80 Magnum as alienum Collegia, uel Domos constare non sinat, si soluendo fore probabiliter non speret, habita ratione reddituum, Et eleemosinarum, quæ ordinarie dari solent, nec in ijs plures habitare permittat, quam ali possint.

Par. 4. c. 2. §. 1. E. 81 Quando contribuendum erit ad sumptus communes Prouincia, statuatur ipse quid cuique Collegio, uel Domui, seruata proportione debita imponi debeat.

P. 6. cap. 2. §. 15. 82 In uestitus ratione tria obseruari faciat; Primum, ut honestus ille sit: Alterum ut ad usum communem, Et approbatum honestorum Sacerdotum eius loci, in quo uiuitur, accommodatus: Tertium, ut professioni paupertatis non repugnet.

83 Videat quomodo mobilia conseruentur, Et eorum inuentarium conferri faciat cum inuentario in precedenti uisitatione a uisitato, uel Prouinciali subscripto.

84 Consideret habitationem, uestes, reliquas suppellectilem, Et officinas, nec necessaria deesse, aut superflua expendi permittat: obseruet etiam, quæ tenentur æconomiae ratio, Et num omnia sint munda.

85 Reliquias Sanctorum, quæ pertinent ad Ecclesiam alicuius Domus, uel Collegij, aut aliquam earum

earum partem, neque externis, neque nostris det; nec permittat, ut a subordinatis Superioribus dentur sine speciali facultate Praepositi Generalis.

De iis, qui bonis suis nondum se abdicarunt. Cap. x.

**N**ON permittat nostros abdicare se possessione bonorum suorum, nisi quos constantes, & stabiles in sua vocatione cognoverit, atque in eare maturo semper consilio procedat.

87 Non sinat pactiones ini in nostros cum parentibus suis, & quibuscunque alijs de legitima parte, & alijs bonis ad se pertinentibus, nisi illi prius admoneantur, Societatem ipsam ad ea bona nullum ius habere; & Generalis de tota re prius informetur. Can. 17.  
tr. congr.

88 Cum quis ex nostris est dispositorus de bonis suis in auxilium Societatis, admoneatur Generalis de eorum valore, & de animo relinquentis, & necessitate etiam Domorum, & Collegiorum provinciae, si in ea huiusmodi bona sint. Can. 15 &  
16. tr. cōg.

89 Si aliqua bona applicabuntur Societati cum facultate Generalis, magnopere curet Provincialis, ut cum aedificatione, & caritate, & non cum rigore exigantur, potiusque per Procuratores externos, quam per nostros: expediet quoque, ut ex his eleemosyna aliqua in pauperes eius oppidi, ubi sunt bona, distribuantur: & ratio dati, & accepti talium

B 3 bono-



bonorum scripto constet, ut ipse, aut Superior illius Domus, uel Collegij, cui applicata fuerunt, eam redere possit ei, qui à Generali fuerit designatus.

90 Non ferat nostros quicquam petere à parentibus, cognatis, uel amicis, sed omnia eis necessaria à Societate prouideantur; <sup>f</sup> intelligatque etiam si quibusdam ad tempus proprietates bonorum temporalium permittitur, usum tamen eorum ad propriam utilitatem nulli esse concedendum.

f In ex. c.  
4. S. 4. & P.  
4. c. 4. li. E.

## De modo, quo cum Generali, & alijs Prouincijs, ac externis se habere debeat. Cap. XI.

91 **O**bedientem, reuerentem, ac fidelem se Proposito Generali exhibeat, & in hac re subditis in primis exemplum præbeat: idque potissimum curet, ut omnes de suis Superioribus bene sentiant, eisque peculiari deuotione afficiantur.

92 Perspecta Generali esse cupiat omnia, quæ ad suam Prouinciam pertinent, eaque per se, & Superiores domorum, & collegiorum, & Consultores suæ prouinciæ iuxta formulam scribendi manifestari diligenter curet.

93 Cogitet de communi bono Societatis; illudque inueniet: congregationes prouinciæ suo tempore iuxta formulam traditam cogat: si quid annotauerit circa

circa Decreta, & Constitutiones, vel quid aliud, quod Congregationem generalem exposcat, Praeposito Generali scribat, vel Procuratori tertio quoque anno ad eundem venturo tradat.

94 Si occasio se obtulerit iuuandi alias prouincias, non desit caritatis officio; & litterarum communicatione iuxta formulam scribendi mutuam concordiam & caritatem foueat.

95 Beneuolos, & deuotos conseruet, curetque, P. 10. li. B. ut benefactoribus se gratos nostri exhibeant; si qui autem aduersantur Societati, studeat, ut melius informati reconcilientur.

96 Quae elemosinae externis pauperibus, siue ordinariae, siue extraordinariae dari debeant, ipse Superioribus praescribet auditis Consultoribus pro Collegij, uel Domus facultate: Vbi uero habentur bona ecclesiastica elemosinas aliquas fieri prouidebit in locis praecipue, ubi huiusmodi redditus percipiuntur.

## De communi ratione iuuandi proximos. Cap. XII I.

97 **I**ntelligat praesertim sub finem studiorum, P. 4. e. 10. qui ex nostris, & quousque, quibusque rationibus domi, & foris externis se communicare debeant: quod tamen non nisi probatis, & in uocatione stabilibus, discretis, <sup>t</sup> & bene instructis, quique S. 10. & c. alios aedificare possint, concedendum erit. U. S. 3. & lit. C.

B 4      Considera



**P. 4. c. 8. §.** 98 Consideret num missæ celebrentur, & sacra-  
**2. & p. 10.** **S. 2.** menta alia ministrentur iuxta usum Romanæ Ec-  
 clesiæ, concionandi etiam, & doctrinæ Christianæ  
 docendæ modum obseruet: curetq; ut in his omni-  
 bus nostri vniformes sint, & ut finem, quem Socie-  
 tas intendit assequantur.

**Can. 74.** 99 Videat, num in Domibus, & Collegijs concio-  
**tr. cong.** natores, & confessarij ad sua munera idonei sint, &  
 Statuat pro ratione instituti, & loci, quam frequen-  
 ter domi, uel foris concionandum, uel publice le-  
 gendum sit, uel doctrina Christiana tradenda, &  
 tempore pestis aliqui ab eo designentur, qui separa-  
 ti ab alijs proximis iuuandis uacent.

100 Det operam, ut confessarij maturioris sint  
 ætatis quantum fieri potest, præsertim qui ad con-  
 fessiones mulierum audiendas mittuntur.

**P. 10. §. 12** 101 Curet ut nostri gratijs, & priuilegijs apo-  
 stolicis prudenter, & moderate utantur.

102 Efficiet, ut in festis, quæ à nostris præcipue  
 celebrari solent, ornatus nostrarum ecclesiarum sit  
 moderatus, ac religiosus, & quoad fieri potest, si-  
 ne nimia distractione nostrorum, & molestia ex-  
 ternorum.

**P. 4. c. 8. §.** 103 Curet, ut in ecclesijs Domorum professorum,  
**p. 7. c. 4.** & Collegiorum suæ prouinciæ ministeria Societa-  
 tis iuxta constitutiones exercentur: In ijs tamen  
 locis, in quibus simul Domus professorum, & Col-  
 legium fuerit, eiusmodi ministeria in Domo exercen-  
 da

da curabit: In Collegijs uero ea, quæ ad studia litterarum, & auxilium spirituale scholasticorum pertinent, tractanda sunt.

104 Non permittat, ut cum congregationibus externorum, quæ confraternitates dicuntur, nostri misceantur, nec in Domibus, uel Collegijs ulli conuentus agantur, nisi qui ad finem earundem Domorum, & Collegiorum in diuino obsequio fient. P. 7. cap. 4.  
lit. 9.

105 Si examinandi ministerium ab Ordinario in iunctum effugere nostri nulla ratione possint, illud tamen retinere nitantur, ne iudicium de admittendis, uel non admittendis ferant, sed illud omnino Prelatis relinquatur. Can. 49.  
tr. congr.

## De missionibus, & mutationibus nostrorum. Cap. XIII.

106 **P**rovincialis non abeat a sua Prouincia sine Generalis facultate, nec Præpositus, aut Rector à sua domo, uel collegio absq; licetia Prouincialis, nisi locus esset vicinus, aut sine graui incōmodo Superioris responsum expectari non posset.

107 In mittendis operarijs per Prouinciam extra domos, & collegia, ut in uinea Domini laborent, obseruet quæ in constitutionibus, & regulis missionum dicuntur: uideat tamen ne Domus, & Collegia necessarijs ministris destituantur.

108 Quocunque mittat aliquem, eum per se, uel alium



**P. 7. c. 1. S.** alium plene instruat, & ordinarie in scriptis tam  
**S. & c. 2 S.** de modo procedendi, quam de medijs, quibus eum  
**2. & can.** uti uelit ad finem, quem in animo habet.

**74. tr. cōg.**

**P. 7. c. 2.**

**S. 2.**

**109** Per crebram litterarum communicationem iuxta formulam scribendi totius successus certior factus ex eo loco, ubi ipse commoratur, consilio, & orationibus, & alijs rationibus eum iuuabit, ut per sona, & negotium postulerit.

**110** Optimi quique, & maturiores ad proximos iuuandos, quantum commode fieri poterit, mittantur, & si ei uidebitur expedire, alicui Superiori uiciniore domus, uel collegij subiiciantur.

**Par. 7. c. 2.**  
**lit. H.**

**111** Cum mutari aliquem oportebit animaduertat, ut ad eum reuocandum, quoad fieri poterit, ijs medijs utatur, ut ij, a quibus euocatur, potius beneuoli omnino maneant, quam offensi, uel male affecti.

**In Bulla 3.**

**Pauli 3.**

**112** Si missum a Superiore, uel a summo Pontifice minus utiliter occupari uideret, Generalem admoneat.

**113** Extra Prouinciam suam neminem mittat, nec etiam ad laborandum in uinea Domini, nisi negotij alicuius, aut peregrinationis causa, aut nisi ei constaret de Generalis uoluntate, uel conueniret cum Prouinciali illius prouinciae, ad quam mittere aliquem uoluerit: in Prouincijs tamen transmarinis he transmutationes sine facultate Generalis ne fiant.

Muta-

114 Mutationes personarum ab vno in alium locum suæ Prouinciæ ad ipsum pertinent, quæ tamen fieri non debent sine causa alicuius momenti, nec cum detrimento, quantum fieri potest, eius loci à quo amouentur. Can. 106.  
tr. congr.

115 Cum peregre erit nostris proficiscendum, aliquem, cui maximè confidat præficiet, cui toto itineris tempore cæteri tamquam Superiori in omnibus obediant.

116 Ad retinendam religiosam disciplinam, & paupertatis rationem det operam, ut nostri in processibus, quos ipsorum Superiores id præstare posse iudicauerint, in toto uel in parte pedestri itinere utantur, & in equitando solius necessitatis siue personæ, siue negotiorum ratio habeatur. Can. 62.  
tr. congr.

117 Expensas itinerum soluere eius erit Prouinciæ, aut Collegij, aut Domus in cuius bonum, & utilitatem cedit processio: quod si in ea re dubium esset, arbitrio ipsius auditis Consultoribus statuendum relinquitur: si aliquando tamen inter aliquos Prouinciales non conueniret, recurrant ad Generalem. Can. 31.  
tr. congr.

118 Quando quis ab uno loco ad alium transferatur, Superior ad quem talis mittitur informandus est, quantum ad cognoscendum, & iuuandum eum sit satis. Neminem autem ex vno in alium locum ire permittat sine litteris patentibus. P. 3. c. 1.  
lit. A.

De



## De uisitatione. Cap. XI III.

Can. 76.  
rr. cong.  
& p. 8. c. 1.  
lit. 1.

119 **S**ingulis annis per se ipsum singula loca suae Prouinciae uisitet, cum hoc sit ualde proprium sui officij, & ibi diutius immoretur, ubi magis erit opus, praesertim in loco ad communicationem cum inferioribus, & Generali Praeposito magis commodo.

120 Si quando ob causas grauiores uisitare omnia loca suae Prouinciae ipse non possit, re cum suis Consultoribus collata, adea quae non potest, sibi alium substituatur.

121 Cum ad Domum, uel Collegium aliquod peruenerit, Superiorem interroget, num aliquid urgeat, cui statim necessario sit remedium adhibendum, & Visitationes praeteritas petat, deinde omnes simul benigne alloquatur, eosque ad renouationem in spiritu, & studium perfectionis hortetur.

122 Incipiat Visitationem à templo cuius ostio clauso uideat quomodo custodiatur Sanctissimum Eucharistiae Sacramentum: mox uisitet sacrum infirmorum oleum, & sanctorum reliquias, altaria, sedesque Confessariorum, atque alia, quae tam in templo, quam in Sacrificia ad diuinum cultum pertinent.

123 Postea ad uisitationem personarum accedat, & curet, ut omnibus beneuolam se exhibeat, ne alicuius mentem subeat suspicio, quod ob sinistra-

ali-

*aliquas informationes minus hilarem vultum ipsis ostendat.*

124 Petat à Superiore, & consequenter à Consultoribus, & ab aliquibus Patribus antiquioribus uel præcipuis officialibus, ut ea, quæ sciunt alicuius momenti de statu Collegij, uel Domus, aut de personis referant: quod si iudicauerit expedire, iubere poterit, ut informationes, huiusmodi, uel partem earum breuiter scribant, & sibi tradant: scripta autem, quæ secretum continent, clausa ipse diligentissime seruet, caueatque ne minimo quidem indicio eos, qui sibi aliquid referunt, prodat.

125 Huiusmodi informationibus acceptis, & consideratis, percurrat cum Superiore catalogum personarum domus, uel collegij, breuemque de singulis ab eo capiat informationem.

126 Deinde uocet sigillatim omnes eo ordine, qui ei magis conuenire uidebitur, & singulos seorsum, ac pedetentim interroget iuxta interrogatoria inferius posita, quæ memoriter potius, quam scripto proponi debent: quæ autem circa unumquæque aduertenda iudicauerit, eo audito ipse scribat, ut melius possit eorum recordari.

127 Non omnia, quæ in interrogatorijs habentur, à singulis sunt petenda, sed prudentiæ eius relinquatur, quid ab hoc, uel ab illo interrogandum sit, quin etiam & alia interrogare possit, quæ in interrogatorijs non continentur, si id opportunum  
iudi-



judicaret.

128 Hortetur omnes ad ueritatem sincere dicendam, ne ipsis imputetur, si morbi propter eorum silentium incogniti, & latentes curari non possint.

129 Admoneantur etiam omnes, teneri eos seruare sub secreto, quicquid cum eo, quod secretum requirit, transegerint, licet à quouis alio, qui ipso sit inferior de eare interrogentur.

130 Non facile credat, si quæ forsan contra alios, præsertim Superiores dicentur, sed ea notet, & expendat, ut ueritatem assequatur.

Par. 8. c. 1.  
S. 5.

131 Si quis diuisionis, aut dissensionis eorum, qui unà uiuunt, inter se, uel cum suo capite auctor esse inueniretur, diligentissime ab ea congregatione, uelut pestis, quæ eam potest inficere, si præsens remedium non adhibeatur, separandus est.

132 *Visitatio rerum, aut partium domus iuxta ea, quæ in præcedentibus regulis, præsertim in nono capite huius officij dicta sunt, fieri debet, in qua simul examinandæ sunt regulæ officialium, qui eiusmodi rerum curam habent; si quid autem, non solum informationem, sed in spectionem requirat, ipse per se, aut per socium id præstabit.*

133 *Summarium Constitutionum, & regulas communes coram Superiore, Consultoribus, & Ministro examinabit, & si quas non obseruari intellexerit, consideratis causis remedia adhibebit,*

bit, ut obseruari possint, Regulas autem Ministri, Consultorum, & Admonitoris, Concionatorum, & Sacerdotum, itemque præcipuorum officialium ipse per se cum iisdem examinabit: reliquas uero aliorum officialium poterit socio, aut alteri coram singulis eorum examinandas committere.

134 Prouincialis integram rationem totius antea uitæ iuxta constitutiones ab ijs exigat, qui Societatem ingrediuntur: quod si id aliquando per se præstare non poterit, substituatur ad id ordinarie Superiorem Domus, uel Collegij. Singulis uero annis in quacunque Domo, uel Collegio suæ Prouinciæ absoluta rerum domesticarum uisitatione, aut in ipso uisitationis decursu (si id opportunius in aliquibus fore iudicaret) rationem conscientie ab omnibus accipiat ab ultima, quam reddiderunt iuxta interrogatorium secretum. Quod si uisitatio circa renouationem uotorum inciderit (quam extra statutum tempus ratione sui aduentus in Domum aliquam, uel Collegium præsertim magnum per unum, aut alterum mensem præmittere, aut differre poterit) ipse ad excipiendas confessiones generales nostrorum aliquos Patres probatos, & maturiores designabit, eosque qui sibi confiteri uolent, benigne audiet.

In ex.c.4.  
§.36.

135 Postremum omnium uisitet Superiorem Domus, uel Collegij circa ea, quæ ad personam,

¶



Et officium eius attinent, iuxta officij eius regulas, Et ea, quæ ex acceptis informationibus collegerit.

136 Visitatione cuiusque Domus, uel Collegij absoluta, Et rebus omnibus perspectis, ut laboris sui fructum capiat, denuo omnia, quæ accepit in uisitatione, consideret, Et ea quæ maioris momenti sunt, diligentius expendat, quid item clarum, quidue tantum probabile uideatur, Et de quibus Generalis consulendus est, Et quæ cum solo Superiore Domus, uel Collegij, quæ etiam cum Consultoribus, Et quæ cum alijs particularibus sint transigenda diligenter discernat.

137 Postquam apud se omnia constituerit, Et quæ scribenda sunt, scripserit, ijs etiam, quos de quaque re melius iudicare posse confidet, hæc, uel illa expendenda tradat, Et antequam ultimam executionis manum rebus imponat, omnia in orationibus, Et missarum sacrificijs Deo commendat, ut iuxta ipsius diuinum beneplacitum dirigantur.



De

DE IIS, QUAE IN VISI-  
tatione interroganda sunt.

C A P. X V.

Interrogatorium de ijs, quæ ad gubernationem pertinent, Superioribus, & Confultoribus, & alijs quibus uidebitur, proponendum.

**I**NTERROGET si quid grauius in ea Domo, uel Collegio accidisse extra confessionem intellexerit, & quod remedium sit adhibitum.

2 Quomodo seruentur regulæ, quæ ad Nouitios pertinent.

3 An aliqui, præsertim pueri, aut mulieres ad uota emittenda inducantur, uel ad consilia alia obseruanda indiscrete trahantur.

4 An aliquis domi nimis affectus uideatur ad cõsanguineos, uel ad eorum subuentionem teneatur.

5 De numero, & sufficientia Confessariorum, & de frequentia, & fructu confitentium.

6 An aliqui uideantur finitis iam studijs educendi è Collegijs.

7 An infirmi, hospitalia, carceres, & triremes (ubi essent) uisitentur, & adiuuentur à nostris.

C Ex



8 *Ex quibus operibus pijs, iuxta nostrum institutum, maior fructus percipiatur.*

9 *De cura in tradendis spiritualibus exercitijs, & qua exactione.*

10 *De modo conuersandi iuxta rationem, & finem nostri instituti.*

11 *De missionibus, & earum fructu, & modo procedendi eorum, qui mittuntur.*

12 *An aliqui prætextu valetudinis inuandæ à spiritus perfectione degenerent, & à laboribus nostri instituti abhorreant, atque ad otium aspirent.*

13 *An aliqua ambitionis indicia in aliquo appareant.*

14 *Quæ elemosinæ externis pauperibus dentur.*

### Interrogatorium, quod omnibus proponi potest.

15 **Q**uomodo ualeat corpore, & uiribus, & quomodo ei conueniat ratio uictus, uestitus, cubiculi, & exercitationis corporalis, qua utitur.

16 *Si quid dubitationis, aut difficultatis, si quid etiam ad suam consolationem, instructionem, aut profectum fore putat, confidenter proponat.*

17 *Quod ad alios attinet, interrogetur quomodo tractetur à suis superioribus, & quid sentiat de illis, tam de personis, quam de officijs eorum.*

*An*

18 *An aliquis Superior impedierit libertatem subditorum scribendi ad Superiores mediatos, aut verbis, signo, aut aliquo alio modo significauerit, ei non placere, ut nostri de ipso, aut eius gubernatione, ad eosdem scribant.*

19 *An nouerit extra confessionem aliquid de quauis persona, quod non ei probetur, ut de inobedientia, murmuratione, conspirationibus, præsertim contra Superiores, & si quid parum honestum, & incautum in familiaritate nimia cum aliqua persona accidisset, uel contra de dissensione.*

20 *Quomodo seruentur domi constitutiones, decreta, regulæ, communis ordo, & ordinationes, quæ à Præposito Generali, & alijs Superioribus emanant.*

21 *Quomodo exerceantur ministeria Societatis erga externos, quod ad modum, & fructum attinet.*

22 *Quis sit profectus nostrorum in rebus spiritualibus, & quod omnium in solidis virtutibus acquirendis Studium.*

23 *Si de ijs etiam, quæ pertinent ad alias Domus, & Collegia totius Prouinciæ aliquid habet, quod alicuius momenti uideatur, libere proponat.*

### Pro Scholasticis addatur.

24 **Q**uid ingenij, memoriæ, uirium, & propensionis ad litteras in se experiatur.

25 *An occupatione exteriore, uel studijs remoueat,*



ueatur, uel distrahatur à rebus spiritualibus.

26 *An habeat libros necessarios, & an scribat, legat, disputet.*

27 *De suo profectu in litteris quid sentiat.*

28 *An omnia experimenta Societatis fecerit, & quo fructu.*

### De ijs, qui in probatione versantur.

29 *An firmus sit in proposito uiuendi, & moriendi in Societate.*

30 *An sit indifferens ad quemlibet gradum, misteria, & exercitia Societatis, prout obedientia constituent.*

31 *An exercitia spiritualia, uel aliqua alia experimenta fecerit, & in quibus plus profecerit, & alia siuidebitur ex examine.*

### Interrogatorium secretum pro exigenda ratione conscientiae.

32 **I**nterrogetur quisque, quomodo uiuat contentus iuxta suam uocationem, & quid sentiat de ipso instituto Societatis, & medijs, quibus illa uitur ad suum finem consequendum, & quem experia-

periatur in se zelum animarum.

33 Quomodo spiritualibus rebus sit affectus, quantum temporis orationi tribuat, & num uocali, aut potius mentali iuuetur, & ut i plus temporis tribuat, & quem modum in orando teneat.

34 Num in usu rerum spiritualium consolationem, & deuotionem habeat, an uero contra desolationem, ariditatem, & uagationem animi patiatur, & quomodo in ijs se gerat.

35 De fructu, quem ex communionem, confessione, examine praesertim particulari, & alijs exercitijs spiritualibus percipiat.

36 Num post ultimam rationem conscientiae, quam reddidit, maiorem, an minorem fructum fecerit, & quem animum experiatur ad perfectionem consequendam.

37 Quomodo obseruet, quae ex constitutionibus, & regulis tum communibus, tum officij sui ad eum pertinent.

38 Quomodo se habeat circa obedientiam etiam intellectus, paupertatem, castitatem, & usum aliarum virtutum, & quarum praecipue studio intentus sit.

39 An sentiat aliquas animi perturbationes, aut tentationes molestas, & de facilitate, seu difficultate, & modo eis resistendi, & ad quos affectus, uel peccata sit magis propensus, & incitatus.

40 De mortificationibus, paenitentijs, & alijs exercitijs



exercitationibus, quæ faciunt ad spiritus profectum, & in specie de præparatione ad iniurias, & ad alia, quæ ad Christi crucem pertinent ferenda, at que de eorum desiderio.

41 De socijs, & quomodo ex eorum conuersatione proficiat in Domino, & an alicui plus sit familiaris, quam alijs.

42 An auersionem animi sentiat ab aliquo, & an offensus sit in aliquo à Superioribus, uel officialibus, uel quauis alia persona, & quomodo sit affectus erga Superiores.

43 An tentationes aliquas sit passus, quas alij intellexerint, præsertim circa uocationem.

44 An contra constitutiones, uel regulam aliquam, uel ordinationem Superiorum firmum iudicium habuerit, uel contra eam disputauerit.

45 Demum admoneatur, ut magnacum puritate, & humilitate sub sigillo confessionis, aut secreti, aut quacunque ratione ipsi placuerit, & ad maiorem ipsius consolationem fuerit, totam animam suam integre manifestam faciat, nullam rem celando, qua Dominum uniuersorum offenderit post ultimam rationem redditam conscientie, uel certe aperiat eos defectus, qui magis ab eo tempore grauant ipsius animam.



# INDEX CAPITVM REGVLARVM PROVINCIALIS.

<b>D</b> E iis, quæ ad eius personam & communem totius Prouinciæ administrationem spectant. Cap. I.	pag. 3.
Deijs, quæ illum ad bonam Prouinciæ administrationem iuuabunt. Cap. II.	p. 5.
De Superioribus ei subordinatis, & eorum officialibus. Cap. III.	p. 7.
De Admittendis Cap. IIII.	p. 9.
De Dimittendis. Cap. V.	p. 11.
De Litterarum studijs Cap. VI.	p. 12.
De Promouendis ad ordines, & gradus literarios Cap. VII.	p. 15.
De promouendis in professos, & coadiutores formatos, ac scholares Cap. VIII.	p. 16.
De rebus Collegiorum & Domorum Cap. IX.	p. 18.
Deijs, qui bonis suis nondum se abdicarunt. Cap. X.	p. 21.
De modo, quo cum Generali, & alijs prouincijs, ac externis se habere debeat Cap. XI.	p. 22.
De communi ratione iuuandi proximos. Cap. XII.	p. 23.
De missionibus, & mutationibus nostrorum. Cap. XIII.	p. 25.
De Visitatione Cap. XIIIII.	p. 28.
De ijs, quæ in visitatione interroganda sunt. Cap. XV.	p. 33.






INDEX CAPITULUM  
RECAVAVIM  
PROVINCIALIS

Faint, mirrored text from the reverse side of the page, appearing as bleed-through. The text is largely illegible due to its orientation and fading.

Inv. 5137



REGVLAE  
PRAEPOSITI  
DOMVS  
PROFESSAE.



VENETIIS, M D LXXX.  
*Cum facultate superiorum.*







Cinquecentina

n. 391

18









